

欽定宋史

卷二百
四十二
四十二

宋史卷二百四十二

元中書右丞相總裁脫脫等修

列傳第一

后妃上

太祖母昭憲杜太后

太祖孝惠賀皇后
孝明王皇后

孝章宋皇后

太宗淑德尹皇后
懿德符皇后

明德李皇后
元德李皇后

真宗章懷潘皇后
章穆郭皇后

章獻明肅劉皇后

李宸妃

楊淑妃

沈貴妃

仁宗郭皇后

慈聖光獻曹皇后

張貴妃

苗貴妃

周貴妃

楊德妃

馮賢妃

英宗宣仁聖烈高皇后

周人尊祖之詩曰厥初生民時維姜嫄蓋推本后稷之所自出以爲王跡之所由基也宋之興雖由先世積累然至宣祖功業始大昭憲杜后實生太祖太宗內助之

賢母範之正蓋有以開宋世之基業者焉觀其訓太祖以無逸治天下至於豫定太宗神器之傳爲宗社慮蓋益遠矣厥後慈聖光獻曹后擁佑兩朝宣仁聖烈高后垂簾聽政而有元祐之治南渡而后若高宗之以母道事隆祐孝宗奉明慈怡愉之樂皆足以爲百王法程宋三百餘年外無漢王氏之患內無唐武韋之禍豈不卓然而可尚哉昭憲垂裕之功至是茂矣舊史稱昭憲性嚴毅有禮法易之家人上九日有孚威如終吉其是之謂歟作后妃傳

太祖母昭憲杜太后定州安喜人也父爽贈太師母范

氏生五子三女太后居長旣笄歸于宣祖治家嚴毅有禮法生邕王光濟太祖太宗秦王廷美夔王光贊燕國陳國二長公主周顯德中太祖爲定國軍節度使封南陽郡太夫人及太祖自陳橋還京師人走報太后曰黠檢已作天子太后曰吾兒素有大志今果然太祖卽位尊爲皇太后太祖拜太后於堂上衆皆賀太后愀然不樂左右進曰臣聞母以子貴今子爲天子胡爲不樂太后曰吾聞爲君難天子置身兆庶之上若治得其道則此位可尊苟或失馭求爲匹夫不可得是吾所以憂也太祖再拜曰謹受教建隆二年太后不豫太祖侍藥餌

不離左右疾亟召趙普入受遺命太后因問太祖曰汝知所以得天下乎太祖鳴噎不能對太后固問之太祖曰臣所以得天下者皆祖考及太后之積慶也太后曰不然正由周世宗使幼兒主天下耳使周氏有長君天下豈爲汝有乎汝百歲後當傳位於汝弟四海至廣萬幾至衆能立長君社稷之福也太祖頓首泣曰敢不如教太后顧謂趙普曰爾同記吾言不可違也命普於榻前爲約誓書普於紙尾書臣普書藏之金匱命謹密宮人掌之太后崩于滋德殿年六十諡曰明憲葬安陵神主祔享太廟乾德二年更諡昭憲合祔安陵

太祖孝惠賀皇后開封人右千牛衛率府率景思長女也性溫柔恭順動以禮法景思常爲軍校與宣祖同居護聖營晉開運初宣祖爲太祖聘焉周顯德三年太祖爲定國軍節度使封會稽郡夫人生秦國晉國二公主魏王德昭五年寢疾薨年三十建隆三年四月詔追冊爲皇后乾德二年三月有司上諡曰孝惠四月葬安陵西北神主享于別廟神宗時與孝章淑德章懷並祔太廟

孝明王皇后邠州新平人彰德軍節度饒第三女孝惠崩周顯德五年太祖爲殿前都點檢聘后爲繼室后恭

勤不懈仁慈御下周世宗賜冠帔封琅邪郡夫人太祖
卽位建隆元年八月冊爲皇后常服寬衣佐御膳善彈
箏鼓瑟晨起誦佛書事杜太后得驩心生子女三人皆
天乾德元年十二月崩年二十二有司上謚翰林學士
竇儀撰哀冊文二年四月葬安陵之北神主享于別廟
太平興國二年祔享太廟

孝章宋皇后河南洛陽人左衛上將軍偓之長女也母
漢永寧公主后幼時隨母入見周太祖賜冠帔乾德五
年太祖召見復賜冠帔時偓任華州節度后隨母歸鎮
孝明后崩復隨母來賀長春節開寶元年二月遂納入

宮爲皇后年十七性柔順好禮每帝視朝退常具冠帔
候接佐御饌太祖崩號開寶皇后太平興國二年居西
宮雍熙四年移居東宮至道元年四月崩年四十四有
司上謚權殯普濟佛舍三年正月祔葬永昌陵北命吏
部侍郎李至撰哀冊文神主享于別廟神宗時升祔太
廟

太宗淑德尹皇后相州鄴人滁州刺史廷勛之女兄崇
珂保信軍節度太宗在周時娶焉早薨及帝卽位詔追
冊爲皇后并謚葬孝明陵西北神主享于別廟後升祔
太廟

懿德符皇后陳州宛邱人魏王彥卿第六女也周顯德中歸太宗建隆初封汝南郡夫人進封楚國夫人太宗封晉王改越國開寶八年薨年三十四葬安陵西北帝卽位追冊爲皇后諡懿德享于別廟至道三年十一月詔有司議太宗配宰相請以后配詔從之奉神主升祔太廟后姊周世宗后也淳化四年殂

明德李皇后潞州上黨人淄州刺史處耘第二女開寶中太祖爲太宗聘爲妃旣納幣會太祖崩至太平興國三年始入宮年十九雍熙元年十二月詔立爲皇后后性恭謹莊肅撫育諸子及嬪御甚厚嘗生皇子不育至

道二年封后嫡母吳氏爲衛國太夫人後改封楚國及封后母陳氏爲韓國太夫人太宗崩真宗卽位至道三年四月尊后爲皇太后居西宮嘉慶殿咸平二年宰相請別建宮立名從之四年宮成移居之仍上宮名曰萬安景德元年崩年四十五謚明德權殯沙臺二年十月耐葬永熙陵禮官請以懿德明德同耐太宗廟室以先後爲次從之

李賢妃真定人乾州防禦使英之女也太祖聞妃有容德爲太宗聘之開寶中封隴西郡君太宗卽位進夫人生皇女二人皆早亡次生楚王元佐妃嘗夢日輪逼已

以裾承之光耀遍體驚而寤遂生真宗太平興國二年薨年三十四真宗卽位追封賢妃又進上尊號爲皇太后有司上諡曰元德咸平三年祔葬永熙陵以中書侍郎平章事李沆爲園陵使車駕詣普安院攢宮素服行禮拜伏鳴咽命駕部郎中知制誥梁周翰撰哀冊神主祔別廟大中祥符元年追贈后父英檢校太尉安國軍節度常山郡王母魏國太夫人大中祥符三年禮官趙湘請以后祔太宗廟室真宗曰此重事也俟令禮官議之六年秋宰相王旦與羣臣表請后尊號中去太字升祔太廟明德之次從之

真宗章懷潘皇后大名人忠武軍節度美第八女真宗
在韓邸太宗爲聘之封莒國夫人端拱二年五月薨年
二十二真宗卽位追冊爲皇后諡莊懷葬永昌陵之側
陵名保泰神主享于別廟舊制后諡冠以帝諡慶歷中
禮官言孝字連太祖諡德字連太宗諡遂改莊爲章以
連真宗諡云

章穆郭皇后太原人宣徽南院使守文第二女淳化四
年真宗在襄邸太宗爲聘之封魯國夫人進封秦國真
宗嗣位立爲皇后景德四年從幸西京還以疾崩年三
十二后謙約惠下性惡奢靡族屬入謁禁中服飾華侈

必加戒勗有以家事求言於上者后終不許兄子出嫁以貧欲祈恩賚但出裝具給之上尤加禮重及崩上深嗟悼禮官奏皇帝七日釋服特詔增至十三日太常上謚曰莊穆靈駕發引命翰林學士楊億撰哀冊葬永熙陵之西北神主享于別廟以后弟崇儀副使崇仁爲莊宅使康州刺史姪承慶承壽皆遷官大中祥符中封后母高唐郡太夫人梁氏萊國太夫人仁宗卽位升祔真宗廟室改謚章穆

章獻明肅劉皇后其先家太原後徙益州爲華陽人祖延慶在晉漢間爲右驍衛大將軍父通虎捷都指揮使

嘉州刺史從征太原道卒后通第二女也初母龐夢月入懷已而有娠遂生后后在襁褓而孤鞠於外氏善播鼗蜀人龔美者以鍛銀爲業攜之入京師后年十五入襄邸王乳母秦國夫人性嚴整因爲太宗言之令王斥去王不得已置之王宮指使張耆家太宗崩真宗卽位入爲美人以其無宗族乃更以美爲兄弟改姓劉大中祥符中爲修儀進德妃自章穆崩真宗欲立爲皇后大臣多以爲不可帝卒立之李宸妃生仁宗后以爲己子與楊淑妃撫視甚至后性警悟曉書史聞朝廷事能記其本末真宗退朝閱天下封奏多至中夜后皆預聞宮

闕事有問輒傳引故實以對天禧四年帝久疾居宮中
事多決於后宰相寇準密議奏請皇太子監國以謀泄
罷相用丁謂代之既而入內都知周懷政謀廢后殺謂
復用準以輔太子客省使楊崇勲內殿承制楊懷吉詣
謂告謂夜乘犢車挾崇勲懷吉造樞密使曹利用謀明
日誅懷政貶準衡州司馬於是詔皇太子開資善堂引
大臣決天下事后裁制於內真宗崩遺詔尊后爲皇太
后軍國重事權取處分謂等請太后御別殿太后遣張
景宗雷允恭諭曰皇帝視事當朝夕在側何須別御一
殿於是請帝與太后五日一御承明殿帝位左太后位

右垂簾決事議已定太后忽出手書第欲禁中閱章奏
遇大事卽召對輔臣其謀出於丁謂非太后意也謂旣
貶馮拯等三上奏請如初議帝亦以爲言於是始同御
承明殿百官表賀太后哀慟有司請制令稱吾以生日
爲長寧節出入御大安輦鳴鞭侍衛如乘輿令天下避
太后父諱羣臣上尊號曰應元崇德仁壽慈聖太后御
文德殿受冊天聖五年正旦太后御會慶殿羣臣及契
丹使者班廷中帝再拜跪上壽是歲郊祀前出手書諭
百官母請加尊號禮成帝率百官恭謝如元日七年冬
至天子又率百官上壽范仲淹力言其非不聽九月詔